

Minister Plenipotenciario, Edwin Abath

Betico Croes a logra finaliza y culmina e lucha cu pa hopi tempo a existi y biba den curazon di Arubianonan



DEN HAAG – Na Cas di Aruba a tuma lugar ayera diabierna 21 di Januari, na vispera di Dia di Betico, un ceremonia pa recorda e fecha di natalicio di sr. Gilberto François “Betico” Croes, politico y estadista Arubiano. E programa a cuminsa cu cantamento di nos himno nacional ‘Aruba Dushi Tera’. Minister Plenipotenciario sr. Edwin Abath a inicia su discurso cu e frase: ‘E retonan di ayera, t’e logronan di awe y e logronan di cada un di nos ta orguyo di nos tur’.

Sr. Edwin Abath a menciona e importancia di sr. Betico Croes p’e logro di Status Aparte y cu na anticipacion di e fecha natalicio di 25 di Januari t’e

momento husto pa para keto n’e logronan di awe.

‘Betico Croes den su contexto di tempo a logra pa finaliza y culmina e lucha cu pa hopi tempo a existi y a biba den e curazon di e Arubianonan. Un lucha cu no ta basa riba interes comercial, no riba interes politico, pero un lucha cu a biba den curazon di e Arubiano pa determina su mes, e futuro di su pais, e futuro di su yiunan y e generacion cu ta sigi,’ asina sr. Edwin Abath a bisa.

Segun e mandatario, esaki a traduci su mes den un sentimento di orguyo cu na 1986, prome di Januari, Aruba a logra di ta pais autonomo den Reino y cu esaki t’e culminacion di un lucha cu

a dura mas di 60 aña.

‘Pesey un fecha asina y tambe riba un fecha manera 18 di maart nos tur ta di hubileo, los di nos afiliacion politico; los di cualkier preferencia cu nos por tin, nos como Arubiano, e ser Arubiano no solamente esnan cu ta bisa di ta Arubiano, pero en general tur esnan cu a contribui n’e exito di Aruba y tur esnan cu den nan curazon ta sinti cu nan ta Arubiano.

Nos tur cu a sinti cu e logronan aki a habri caminda pa nos por logra exitonan grandi pa nos pais.’

E mandatario a bisa cu den e aña aki cu Aruba ta celebra 25 aña di Status Aparte, e ta un motibo grandi pa mira atras y

mira con aña pasa paisnan nobo a logra e status aki, diferente cu Aruba, pero sinembargo esaki ta duna di compronde cu Aruba a gana dilanti y cu Aruba ta hopi consciente di su balornan y locual e isla kier a logra pa e generacionnan.

‘Mi ta pone enfasis riba e fecha di natalicio, pasobra mescos cumi, mi ta kere cu bosonan ta di opinion cu mester celebra bida di un persona y no su desaparicion. Laga nos celebra e bida di esnan cu a haci logronan grandi pa nos pais. E bida cu a conduci n’e logronan aki y esey t’e hecho pa celebra,’ asina sr. Edwin Abath a bisa.

Minister di Salubridad y De-

porte, sr. Richard Visser tambe a enfatisa den su discurso e importancia di sr. Betico Croes pa cu Aruba.

‘Nos tabatin visionarionan na Aruba y sr. Betico Croes ta un di nan cu a pone nos 25 aña dilanti di nos hermana islanan y cu nos a probecha di esaki te aworaki. E ta motibo si cu nos mester keda dilanti.

Mi ta kere cu nos como Aruba semper ta luchando den e mesun manera suave y humilde di nos pueblo, pero semper cu vision. Mi ta kere cu nos mester sigi bringa p’esaki,’ asina Minister Visser a bisa.

‘Mas cu nunca den nos economia; den nos status cu nos ta awor, den nos region, nos mester bringa pa keda dilanti. El a bira atrobe un lucha di sobrebibi y mi ta haye mas un lucha pa excelencia.

Mi ta kere cu awe riba e dia aki recordando un di nos heroenan, nos tur mester para un rato unda nos ta hiba Aruba den e proximo 25 of 50 aña; p’e futuro generacionnan. Con nos ta bay cuida nos hendenan; con nos ta bay haci e pueblo di Aruba un pueblo mas fuerte; muchanan cu ta crece, studia y pone e pueblo di Aruba riba mapa.

Esaki ta un responsabilidad di nos tur; un responsabilidad di nos banda ta pa mostra e futuro generacion e pasonan cu nos kier pa nan gana,’ segun Minister Visser.

Despues di esaki Minister Plenipotenciario sr. Edwin Abath y Minister di Salubridad y Deporte sr. Richard Viser a pone flor na e busto di Betico Croes na Cas di Aruba.